

Teori 'Pinjam dan Pengaruh' Oleh Samuel M. Zwemer (1867-1952) dan Sanggahan Terhadapnya Menerusi Konsep Wiḥdah Al-Dīn Islam

Wan Mohd Fazrul Azdi bin Wan Razali¹
Universiti Sains Islam Malaysia

Abstrak

Antara hujahan yang selalu digunakan oleh para orientalis untuk mencacatkan (discredit) kedudukan Islam adalah dengan menggunakan argumentasi 'Teori Pinjam dan Pengaruh' (Theory of Borrow and Influence). Sebagai contoh, Samuel M. Zwemer telah membuat catatan yang agak sempurna dalam mendemonstrasikan teori ini melalui karyanya yang popular iaitu Arabia the Cradle of Islam. Islam telah dibedah siasat dalam hal ini dan ditelusuri beberapa bibit ajarannya yang kelihatan mempunyai persamaan dengan ajaran-ajaran agama lain seperti Arab Pagan, Zoroastrianisme, Judaisme, Kristian dan lain-lain. Makalah ini akan menyanggah argumentasi ini melalui konsep wiḥdah al-dīn yang ditekankan oleh Islam.

Kata kunci: teori pinjam dan pengaruh, Samuel M. Zwemer dan wiḥdah al-dīn

Abstract

Among the popular arguments used by the orientalis to discredit Islamic religion is the utilization of the Theory of Borrow and Influence. For instance, Samuel M. Zwemer had perfected his writings in demonstrating this theory through his noted work, Arabia the Cradle of Islam. In this ideal, Islam had gone through such examination and been rooted to the religions of Pagan Arab, Zoroastrianism, Judaism, Christianity and others for the resembling elements shared. This paper will refute this claim under the light of the concept of wiḥdah al-dīn, as stressed in the Islamic religion.

Keywords: epistemology, demarcation of knowledge, westernization, tawhidic

¹ Corresponding author : Wan Mohd Fazrul Azdi Wan Razali, Universiti Sains Islam Malaysia, e-mail: wmfazrul@usim.edu.my

Pendahuluan

Janji Allah adalah sentiasa benar apabila memberitahu para Muslimin untuk sentiasa berjaga-jaga dan bersiap-siaga dalam mendepani sebarang cabaran intelektual yang dikemukakan oleh mereka yang selalu berhipotesis tentang Islam. Cabaran ini sentiasa berlaku dan akan terus dihadapi kepada para Muslimin berdasarkan kepada pelbagai motif pencabar-pencabar Islam ini. Terdapat banyak ayat yang menegaskan hal ini contohnya dalam Surah At-Taubah, ayat 30-33 :

(وَقَالَتِ الْيَهُودُ عُزَيْرٌ ابْنُ اللَّهِ وَقَالَتِ النَّصَارَى الْمَسِيحُ ابْنُ اللَّهِ ذَلِكَ قَوْلُهُمْ بِأَفْوَاهِهِمْ يُضَاهَهُونَ قَوْلَ الَّذِينَ كَفَرُوا مِنْ قَبْلُ قَاتَلَهُمُ اللَّهُ أَنَّى يُؤْفِكُونَ اتَّخَذُوا أَحْبَابَهُمْ وَرُهَيْبَانَهُمْ أَرْبَابًا مِنْ دُونِ اللَّهِ وَالْمَسِيحَ ابْنَ مَرْيَمَ وَمَا أُمِرُوا إِلَّا لِيَعْبُدُوا إِلَهًا وَاحِدًا لَإِلَهِ إِلَّا هُوَ سُبْحَانَهُ عَمَّا يُشْرِكُونَ يُرِيدُونَ أَنْ يُطْفِئُوا نُورَ اللَّهِ بِأَفْوَاهِهِمْ وَيَأْبَى اللَّهُ إِلَّا أَنْ يُتِمَّ نُورَهُ وَلَوْ كَرِهَ الْكَافِرُونَ هُوَ الَّذِي أَرْسَلَ رَسُولَهُ بِالْهُدَى وَدِينِ الْحَقِّ لِيُظَاهِرَهُ عَلَى الدِّينِ كُلِّهِ وَلَوْ كَرِهَ الْمُشْرِكُونَ)

Maksudnya: Orang-orang Yahudi berkata: “Uzair itu putera Allah,” dan orang Nasrani berkata: “Al-Masih itu putera Allah.” Demikian itulah ucapan mereka dengan mulut mereka, mereka meniru perkataan orang-orang kafir yang terdahulu. Allah melaknat mereka; bagaimana mereka sampai berpaling? Mereka menjadikan orang-orang alimnya, dan rahib-rahib mereka sebagai tuhan selain Allah, dan (juga mereka mempertuhankan) Al-Masih putera Maryam; padahal mereka hanya disuruh menyembah Tuhan Yang Maha Esa; tidak ada Tuhan (yang berhak disembah) selain Dia. Maha Suci Allah dari apa yang mereka persekutukan. Mereka berkehendak memadamkan cahaya (agama) Allah dengan mulut (ucapan-ucapan) mereka, dan Allah tidak menghendaki selain menyempurnakan cahaya-Nya, walaupun orang-orang yang kafir tidak menyukai. Dialah yang telah mengutus Rasul-Nya (dengan membawa) petunjuk (Al Quran) dan agama yang benar untuk dimenangkan-Nya atas segala agama, walaupun orang-orang musyrik tidak menyukai.

Malah, diriwayatkan daripada Abu Darda' RA, Rasulullah SAW pernah bersabda:

يحمل هذا العلم من كل خلف عدوله، ينفون عنه تحريف الغالين، وانتحال المبطلين، وتأويل الجاهلين.

Maksudnya: Ilmu ini akan dibawa oleh mereka yang adil dari setiap generasi. Mereka menafikan (menentang) penyelewengan golongan yang melampaui batas, dakwaan dusta golongan yang batil (sesat) dan takwilan golongan jahil. (Al-Tahawi, 1994, Vol.10, Hadith no. 3884, pp.17-20)

Dalam lipatan sejarah dakwah Islam, antara pencabar yang kerap kali mengemukakan secara intelektual beberapa isu berkenaan ajaran Islam dan kedudukannya berbanding agama-agama lain adalah terdiri daripada sarjana-sarjana yang mudah digelar sebagai para orientalis. (Said, 1979; Al-Nadwi, 2002; Al-Siba'i, n.d)

Salah seorang orientalis yang buah fikirannya masih dirujuk sehingga ke hari ini ialah Samuel M. Zwemer. Pada tahun 1900, Zwemer telah menerbitkan bukunya yang bertujuan untuk memperlihatkan secara intelektual beberapa isu berkaitan keadaan geografi, masyarakat, politik, dakwah dan akidah Islam. Terbitan ini diberi nama *Arabia the Cradle of Islam* dan telah diterbitkan berkali-kali dalam tahun-tahun berikutnya. Seperti yang ditonjolkan oleh namanya, segala perbincangan yang disusun dalam buku ini adalah penilaian ke atas beberapa dimensi dalam kepercayaan Islam seperti keadaan geografi semenanjung Arab, Tanah Suci Mekah dan Madinah, Tanah Yaman dan Hadramaut, sejarah ringkas semenanjung Arab, Wahhabi di Najd, Pengaruh Turki dan British ke atas Arab, bahasa dan budaya Arab, sejarah Kristian di semenanjung Arab dan misinya, Misi Kristian Amerika di semenanjung Arab dan tips untuk misi prospektif agama Kristian di semenanjung Arab.

Makalah ini akan memfokuskan kepada isu yang dibangkitkan oleh Zwemer berkenaan elemen yang telah Islam dituduh meminjamnya daripada agama-agama lain. Isu ini dapat didasarkan kepada Teori Pinjam dan Pengaruh (*Theory of Borrow and Influence*) yang dipercayai oleh ramai orientalis untuk diguna pakai ke atas penolakan keaslian ajaran Islam. Misalnya, ramai orientalis awal seperti Ignaz Goldziher (1850-1921) dan lain-lain yang turut mengungkapkan dakwaan yang sama. (Goldziher, 1981, pp.4-6 dan Goldziher, 1971, pp. 346-362). Malahan Zwemer sendiri secara jujur menyatakan sumber kepada susunan yang sistematik yang telah beliau lakukan dalam isu ini dipetik daripada sumber-sumber lain seperti daripada karya Thomas Patrick Hughes (1838-1911), William St. Clair Tisdall (1859-1928) dan Abraham Geiger (1810-1874). (Zwemer, 1900, p. 178 dan Zwemer, 1907, p. 86)

Biografi Ringkas Samuel M. Zwemer

Beliau lebih dikenali oleh ramai sarjanawan dengan jolokan *the Apostle to Islam* iaitu utusan Kristian kepada para Muslim. Nama penuhnya ialah Samuel Marinus Zwemer dan dilahirkan pada tahun 1867 di Michigan, Amerika Syarikat. (Wilson Jr., 1996, Vol. 13: 4, p. 163)

Zwemer mendapat pendidikan pengajian tingginya dalam bidang teologi Kristian daripada pelbagai institusi seperti Hope College pada 1887 dan

1904, New Brunswick Theological Seminary pada 1890, Muskingham College pada 1918 dan Rutgers College pada 1919. Antara keahlian profesional Zwemer yang membolehkan dirinya untuk pergi merantau dan melakukan misi di Tanah Arab adalah melalui organisasi *Arabian Mission* (1890-1913). Dalam organisasi ini jugalah Zwemer telah bertemu dengan wanita pilihannya untuk dikahwini iaitu Amy Elizabeth Wilkes.

Antara sumbangan Zwemer yang terbesar dalam orientalisme ialah beliau telah melengkapkan banyak karya untuk usaha misionari Kristian ke atas masyarakat Islam. Antaranya adalah seperti berikut: *Arabia the Cradle of Islam: Studies in the Geography, People, Politics of the Peninsula with an Account of Islam and Mission-work* (1900), *The Moslem Christ: An Essay on the Life, Character and Teachings of Jesus Christ according to the Koran and Orthodox Tradition* (1912), *The Disintegration of Islam* (1916), *A Moslem Seeker After God: Showing Islam at Its Best in the Life and Teachings of Al-Ghazali, Mystic and Theologian of Eleventh Century* (1920), dan banyak lagi. (Yahya Murad. n.d. pp. 656-657). Namun begitu, majalah yang telah beliau asaskan iaitu *The Moslem World* merupakan antara teks yang paling hebat dan telah mempopularkan dirinya. Untuk majalah ini, beliau sendiri bertindak sebagai ketua editor dan melaksanakan penerbitannya secara berkala daripada tahun 1911-1947.

Pada akhir hayatnya, Zwemer bertugas di Princeton College Seminary dengan menulis dan memberikan syarahan umum sehinggalah mencapai umur 70 tahun. Pada umur 84 tahun, Zwemer meninggal dunia di bandar New York iaitu pada tanggal 2 April 1952.

Teori Pinjam Dan Pengaruh Oleh Zwemer

Ramai ulama telah menjelaskan secara nas dan ijihad pemilihan Tanah Arab sebagai nukleus kemunculan Rasulullah SAW. Antara yang mencermati isu ini secara geopolitikal dan sosiohistorikal adalah Prof. Dr. Muhammad Sa'īd Ramadhan Al-Buti. (Al-Būtī, 1991, pp. 44-50)

Namun begitu, dalam *Arabia the Cradle of Islam* dan *Islam: A Challenge of Faith*, Zwemer telah membuat satu jadual yang mengilustrasikan analisisnya kepada sebilangan elemen yang didakwanya telah dipinjam oleh Islam daripada beberapa agama lain. Oleh itu, tidak hairanlah mengapa Zwemer secara langsung menamakan bukunya ini sebagai *Arabia the Cradle of Islam* atau *Tanah Arab: Tempat Bermula Agama Islam* kerana mempercayai pengaruh Tanah Arab yang sangat beragam agama, adat dan kepercayaannya ke atas kemunculan Islam. Malah jadual ini telah diletakkannya dalam satu bab yang sangat istimewa dalam bukunya ini yang diberi tajuk sebagai *Islam in its Cradle – The Moslem's God*.

Terdapat tiga kelompok agama induk yang dinyatakan sebagai 'pemberi pinjam dan pengaruh' kepada rupa bentuk Islam iaitu: 1) Agama Pagan atau kepercayaan awal seperti Sabiun, penyembahan berhala Arab, Zoroastrianisme dan Buddhisme (*Heathenism*). 2) Agama Yahudi (*Judaism*). 3) Agama Kristian (*Christianity*). Di bawah ini disertakan terjemahan lengkap kepada jadual yang telah Zwemer kemukakan. (Zwemer, 1900, p. 178 dan Zwemer, 1907, p. 86)

Jadual 1: Hasil Analisa Elemen yang Dipinjam oleh Islam

Sumber	Isu	Amalan atau Kepercayaan
Agama Pagan atau kepercayaan awal (<i>Heathenism</i>)	Sabiun	Tahyulan astrologi seperti meteorit adalah ditujukan kepada syaitan, menggunakan kalimah sumpah atas nama bintang-bintang
	Penyembahan berhala Arab	Tawaf, kalimah Allah, haji ke Mekah dan menghormati Hajar Al-Aswad, amalan haji seperti cukur rambut, baju, bacaan-bacaan, korban, larian antara Safa dan Marwah, amalan poligami, perhambaan, perceraian, undang-undang sosial, kebersihan dalam ibadat, makanan yang dilarang dan khatan
	Zoroastrianisme	Asal-usul alam semesta, syurga dan perkara berkenaan jin.
	Buddhisme	Penggunaan biji tasbih
Agama Yahudi (<i>Judaism</i>)	Idea dan Kepercayaan (menurut Abraham Geiger)	Kalimah yang mewakili idea Yahudi: Tabut (kitab), Taurah, Eden (syurga °Adn), Jahannam, Rabbi (gelaran bagi pendeta), Ahbar (gelaran bagi pendeta), sakinah (ketenangan), taghut (kejahatan), furqan (pembeza antara hak dan batil) dan banyak lagi.
		Pandangan kedoktrin: tauhid, kebangkitan semula, tujuh syurga dan tujuh neraka, Hari Pembalasan, Ya'juj dan Ma'juj.
		Undang-undang upacara dan moral: solat, taharah dan haid.
		Pandangan tentang kehidupan: penggunaan kalimah Insha Allah
	Kisah dan Legenda (menurut Abraham Geiger)	Kisah Adam, Qabil dan Idris AS.
		Kisah Nuh, banjir, Hud, Ishaq, Isma'il dan Yusuf AS.
		Kisah Ibrahim, bapanya menyembah berhala, Namrud, Firaun, Sembelih anak.
		Kisah Musa dan Harun AS.
		Kisah Shu'ayb, Talut dan Jalut, Sulaiman AS.

Agama Kristian (Christianity)	Penghormatan kepada Kitab Injil
	Penghormatan kepada guru agama
	Penghormatan kepada Nabi Isa AS
	Kefahaman yang salah tentang Trinitati
	Kisah Ashab Al-Kahfi, Iskandar Zulqarnain dan Luqman AS
	Ramadhan bulan berpuasa berasal daripada amalan Lent
	Menginfaqqan harta

Zwemer, dalam perenggan awal sebelum jadual ini dipaparkan kepada pembaca, secara yakin dan pasti telah mendakwa seperti berikut:

The result of a century of critical study by European and American scholars of every school of thought has certainly established the fact that Islam is a composite religion. It is not an invention but a concoction; there is nothing novel about it except the genius of Mohammed in mixing old ingredients into a new panacea for human ills and forcing it down by means of sword. These heterogenous elements of Islam were gathered in Arabia at a time when many religions had penetrated the peninsula, and the Kaaba was a Pantheon. Unless one has a knowledge of these elements of of "the time of ignorance," Islam is a problem. Knowing, however, these heathen, Christian and Jewish factors, Islam is seen to be a perfectly natural and understandable development. Its heathen elements remain, to this day, perfectly recognizable in spite of thirteen centuries of explanation by the Moslem authorities. It is to Jewish Rabbi Geiger that we owe our first knowledge of the extent to which Islam is indebted to the Jews and the Talmud. Rev. W. St. Clair Tisdall has recently shown how Mohammed borrowed even from the Zoroastrians and Sabeans, while as to the amount of Christian teachings in Islam, the Koran and its commentators are evidence. (Zwemer, 1900, p. 178)

Teori ini turut berlaku dalam memahami agama-agama lain seperti teori kewujudan agama Hindu yang berdasarkan Teori Penaklukan Aryan (*Aryan Invasion Theory*) atau Teori Terpengaruh Budaya Aryan (*Aryan Influence Theory*). Namun terdapat ramai sarjana Hindu yang amat menentang keras

teori-teori sebegini kerana kelihatan ingin menaikkan martabat masyarakat Barat melebihi masyarakat Timur yang sekali gus mempersoalkan keaslian amalan keagamaan mereka. (Molloy, 2010, p. 80) Hal yang sama juga ditentang oleh penganut agama Sikhisme yang tidak bersetuju dengan penisbahan teori ini kepada agama mereka yang telah meminjam dan menerima pengaruh daripada agama Hindu dan Islam. (Ibid, p. 203)

Sebenarnya dakwaan sebegini daripada para orientalis ke atas risalah Islam, bukanlah sesuatu yang baru kerana perkara ini telah pun disebutkan dalam Al-Quran Al-Karim semenjak 1400 tahun yang lalu seperti berikut:

(وَيْلٌ يَوْمَئِذٍ لِلْمُكَذِّبِينَ الَّذِينَ يُكَذِّبُونَ بَيِّمَاتِ الدِّينِ (۱۱) وَمَا يُكَذِّبُ بِهِ إِلَّا كَلٌّ مُعْتَدِ أَثِيمٍ إِذَا تُتْلَىٰ عَلَيْهِ آيَاتُنَا قَالَ أَسَاطِيرُ الْأَوَّلِينَ كَلَّا بَلْ رَانَ عَلَىٰ قُلُوبِهِمْ مَا كَانُوا يَكْسِبُونَ كَلَّا إِنَّهُمْ عَنْ رَبِّهِمْ يَوْمَئِذٍ لَّحَجُوبُونَ ثُمَّ إِنَّهُمْ لَصَالُو الْجَحِيمِ ثُمَّ يُقَالُ هَذَا الَّذِي كُنْتُمْ بِهِ تُكَذِّبُونَ)

Terjemahannya: Kecelakaan yang besarlah pada hari itu bagi orang-orang yang mendustakan. (iaitu) orang-orang yang mendustakan hari pembalasan. Dan tidak ada yang mendustakan hari pembalasan itu melainkan setiap orang yang melampaui batas lagi berdosa. Yang apabila dibacakan kepadanya ayat-ayat Kami, ia berkata: "Itu adalah dongengan orang-orang yang dahulu." Sekali-kali tidak (demikian), sebenarnya apa yang selalu mereka usahakan itu menutup hati mereka. Sekali-kali tidak, sesungguhnya mereka pada hari itu benar-benar terhalang dari (melihat) Tuhan mereka. Kemudian, sesungguhnya mereka benar-benar masuk neraka. Kemudian, dikatakan (kepada mereka): "Inilah azab yang dahulu selalu kamu dustakan." (Surah Al-Mutaffifin, Ayat 10 – 17)

Perkara ini ditafsirkan secara mendalam oleh Imam Fakhr Al-Din Al-Razi seperti berikut:

والمراد منه الذين ينكرون النبوة، والمعنى إذا تلى عليه القرآن قال أساطير الأولين، وفيه وجهان أحدهما: أكاذيب الأولين والثاني: أخبار الأولين.

Terjemahannya: Dan maksudnya adalah ditujukan kepada mereka yang mengingkari kenabian iaitu apabila dibacakan kepada mereka bukti al-Quran mereka mengatakan bahawa Al-Quran adalah dongengan atau kisah orang-orang terdahulu. Terdapat dua maksud bagi dongengan di sini iaitu: pertama, pembohongan orang-orang terdahulu dan kedua, khabar oleh mereka yang terdahulu. (Al-Rāzī, 2001, Jilid. 16, p. 406.)

Berikutan daripada itu, sesuai sekiranya kita katakan isu ini sebenarnya adalah juga 'isu klasik yang selalu diangkat' (Syamsuddin Arif, 2008, p. 6). Maka pelbagai hipotesis dinyatakan oleh pelbagai orientalis, dahulu sehinggalah ke hari ini, bahawa Islam merupakan agama peminjam dan terpengaruh daripada beberapa ajaran agama yang terdahulu seperti Romawi, Sabi'un, Zoroastrianisme, Yahudi, Kristian, Arab Jahiliyyah, Buddhisme dan banyak lagi.

Sebenarnya terdapat banyak jalan keluar kepada permasalahan yang dikemukakan oleh para orientalis dalam isu teori pinjam dan pengaruh ini. Hal ini kerana Islam adalah agama hujah dan dalil. Islam bukanlah ciptaan manusia bernama Muhammad bin Abdullah SAW sepertimana yang disebut-sebut dalam tulisan mereka. Tetapi Nabi Muhammad SAW adalah manusia terpilih atas kebijaksanaan dan kekuasaan Allah SWT untuk membawa wahyu terakhir kepada umat manusia.

Oleh itu, makalah ini akan menampilkan jawapan kepada beberapa konteks yang telah dikemukakan sebelum ini oleh Zwemer melalui penjelasan berkenaan satu konsep yang asas dalam agama Islam ini iaitu *wiḥdah al-dīn* atau kesatuan agama yang benar. Konsep ini sebenarnya bukanlah asing kerana telah didukung oleh pelbagai ayat Al-Quran Al-Karim dan Al-Sunnah Al-Nabawiyah. Malah konsep ini juga sebenarnya selari dengan rukun iman yang ketiga dan keempat dalam agama Islam, yakni beriman dengan kitab-kitab wahyu samawi yang asli, yakni bukan kitab Al-Quran Al-Karim sahaja dan kepada semua rasul AS, dan bukan Baginda Muhammad SAW sahaja.

Dalam hadis Jibril AS, disebutkan:

قَالَ فَأَخْبِرْنِي عَنِ الْإِيمَانِ . قَالَ : أَنْ تُؤْمِنَ بِاللَّهِ وَمَلَائِكَتِهِ وَكُتُبِهِ وَرُسُلِهِ وَالْيَوْمِ الْآخِرِ وَتُؤْمِنَ بِالْقَدَرِ خَيْرِهِ وَشَرِّهِ . قَالَ صَدَقْتَ . (رواه البخاري ومسلم)

Seorang lelaki bertanya: "Ceritakan kepadaku tentang Iman." Lalu Baginda SAW bersabda: "Bahawa kamu beriman kepada Allah, para Malaikat-Nya, Kitab-kitab-Nya, Rasul-rasul-Nya, Hari Kiamat dan kamu beriman dengan ketentuan Baik dan Buruk-Nya." Lelaki itu berkata: "Benarlah kamu!" (Riwayat Al-Bukhari dan Muslim)

Malah dalam Surah Al-Baqarah, ayat 285 juga turut dijelaskan perkara yang sama iaitu konsep kesatuan agama samawi yang benar dan wajib diyakini oleh Muslim kerana agama Islam bukanlah bermula dengan Nabi Muhammad SAW, tetapi merupakan silsilah risalah kenabian bermula moyang Adam AS sehinggalah Baginda SAW sebagai utusan terakhir.

***Wihdah Al-Dīn* Dalam Islam**

Antara perkara yang dilalaikan, sama ada sengaja atau pun tidak, oleh sebilangan orientalis adalah konsep *wihdah al-dīn* yang didukung dan ditekankan dalam ajaran Islam. Dalam isu *wihdah al-dīn* ini, perlu difahami bahawa terdapat beberapa pandangan lain berkenaannya. Antara pandangan yang tidak akan disentuh dalam isu ini adalah seperti *wihdah al-dīn* yang bersifat esoterik atau falsafah yang dibawa oleh tokoh-tokoh metafizik dan kerohanian Islam seperti Imam Al-Ghazālī (1058-1111) dalam *Fayṣal Al-Tafrīqah*; Sheikh Muhy Al-Dīn Ibn ʿArabī (1165-1240) dalam *Fuṣuṣ, Tarjumān Al-Ashwāq* dan *Al-Futūḥāt Al-Makkiyyah*; Sheikh Abd Al-Karīm Al-Jīlī (1366-1424) dalam *Al-Insān Al-Kāmil*, Sheikh Farīd Al-Dīn ʿAttār (1145-1221), Mawlānā Jalāl Al-Dīn Al-Rūmī (1207-1273), Sheikh ʿAbd Al-Ghanī Al-Nābulṣī (1641-1731) dan ramai lagi. Ramai yang menyangka bahawa konsep *wihdah al-dīn* yang esoterik ini bersalahan dengan Islam sedangkan perlunya ada perbincangan yang lebih mendalam sebelum seseorang dapat mendatangkan kesimpulan hukum sebegitu. (Al-Turjumān, 2002, pp. 454-477 dan 738-741; Mohamed Rifai Mohamed Ameen, 2008, Bil. 9. p. 173). Malah Sayyed Hossein Nasr (lahir 1933) pernah berpesan kepada peneloh dan pemikir konsep ini untuk tidak tersalah faham dengan konsep-konsep sinkretis dan rancuan di luar sana. Katanya secara tegas:

It need hardly be pointed out that this vision of the transcendent unity of religions stands at the very antipodes of the modern syncretisms and pseudospiritualities which have been growing during the past few decades as a result of the weakening tradition of the west. Not only do they not succeed in transcending forms but they fall beneath them, opening the doors to all kinds of evil forces affecting those who are unfortunate enough to be duped by their so-called universalism. (Seyyed Hossein Nasr, 1999, p. 147)

Dalam Al-Quran dan Al-Sunnah serta huraian para ulama muktabar telah dijelaskan bahawa Nabi Muhammad SAW adalah Rasul dan Nabi yang terakhir daripada rantaian salasilah kenabian yang bertahun-tahun dan ramai jumlahnya. Misalnya, surah Al-Ahqaf 46: Ayat 9, Allah SWT telah memerintahkan Nabi Muhammad SAW untuk memberitahu penduduk Quraisy dan seluruh umat hingga akhir zaman bahawa baginda bukanlah rasul yang pertama. Bahkan, baginda SAW adalah Rasul dan Nabi yang terakhir dan menerima wahyu daripada Tuhan sekalian alam. Menurut Imam Al-Tabrani dalam riwayatnya, jumlah para nabi mencecah sehingga 124,000 orang daripada pelbagai kaum dan bangsa serta era. Firman-Nya:

(قُلْ مَا كُنْتُ بِدَعَا مِنَ الرُّسُلِ وَمَا أَدْرِي مَا يُفْعَلُ بِي وَلَا بِكُمْ إِنْ أَتَّبِعُ إِلَّا مَا يُوحَىٰ إِلَيَّ وَمَا أَنَا إِلَّا نَذِيرٌ مُّبِينٌ)

Maksudnya: Katakanlah: “Aku bukanlah rasul yang pertama di antara rasul-rasul dan aku tidak mengetahui apa yang akan diperbuat terhadapku dan tidak (pula) terhadapmu. Aku tidak lain hanyalah mengikuti apa yang diwahyukan kepadaku dan aku tidak lain hanyalah seorang pemberi peringatan yang menjelaskan.” (Surah Al-Ahqaf, Ayat :9)

Firman Allah SWT dalam ayat yang lain pula berbunyi seperti berikut:

(إِنَّا أَوْحَيْنَا إِلَيْكَ كَمَا أَوْحَيْنَا إِلَىٰ نُوحٍ وَالنَّبِيِّينَ مِنْ بَعْدِهِ وَأَوْحَيْنَا إِلَىٰ إِبْرَاهِيمَ وَإِسْمَاعِيلَ وَإِسْحَاقَ وَيَعْقُوبَ وَالْأَسْبَاطِ وَعِيسَىٰ وَأَيُّوبَ وَيُونُسَ وَهَارُونَ وَسُلَيْمَانَ وَآتَيْنَا دَاوُدَ زَبُورًا ۗ وَرُسُلًا قَدْ قَصَصْنَاهُمْ عَلَيْكَ مِنْ قَبْلُ وَرُسُلًا لَمْ نَقْصُصْهُمْ عَلَيْكَ وَكَلَّمَ اللَّهُ مُوسَىٰ تَكْلِيمًا ۗ رُسُلًا مُبَشِّرِينَ وَمُنذِرِينَ لِئَلَّا يَكُونَ لِلنَّاسِ عَلَى اللَّهِ حُجَّةٌ بَعْدَ الرُّسُلِ وَكَانَ اللَّهُ عَزِيزًا حَكِيمًا)

Sesungguhnya Kami telah memberikan wahyu kepadamu sebagaimana Kami telah memberikan wahyu kepada Nuh dan nabi-nabi yang kemudiannya, dan Kami telah memberikan wahyu (pula) kepada Ibrahim, Isma'il, Ishak, Ya'qub dan anak cucunya, 'Isa, Ayyub, Yunus, Harun dan Sulaiman. Dan Kami berikan Zabur kepada Daud. (163) Dan (kami telah mengutus) rasul-rasul yang sungguh telah Kami kisahkan tentang mereka kepadamu dahulu, dan rasul-rasul yang tidak Kami kisahkan tentang mereka kepadamu. Dan Allah telah berbicara kepada Musa dengan langsung. (164) (Mereka kami utus) selaku rasul-rasul pembawa berita gembira dan pemberi peringatan agar supaya tidak ada alasan bagi manusia membantah Allah sesudah diutusnya rasul-rasul itu. Dan adalah Allah Maha Perkasa lagi Maha Bijaksana. (165) (Surah Al-Nisa' 4: ayat 163-165)

Menurut Imam Ibn Kathir RA (701-774H) dalam tafsirnya menjelaskan bahawa sebab nuzul ayat ini adalah untuk menempelak golongan ahli kitab terdahulu, antaranya Yahudi bernama Sukayn dan 'Adiyy bin Yazid, yang menyangka bahawa Allah SWT tidak menurunkan sebarang wahyu lagi selepas daripada Nabi Musa AS. Maka wahyu ini diturunkan bertujuan membasmi kekeliruan tentang salasilah kerasulan dan kenabian Baginda SAW dan kehujahan wahyu yang dibawa oleh Baginda SAW kepada penduduk Quraisy dan semua umat manusia sehingga hari kiamat, selepas daripada semua nabi-nabi AS terdahulu. (Ibnu Kathir, 2002, Jilid. 2, pp. 523-524)

Hakikatnya, kedudukan baginda SAW yang menggambarkan kesatuan agama para Nabi AS ini adalah umpama batu-bata yang melengkapkan binaan yang telah didirikan. Dalam hadis *labinah*, sabda Baginda SAW:

عَنْ جَابِرٍ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ: مَثَلِي وَمَثَلُ الْأَنْبِيَاءِ كَمَثَلِ رَجُلٍ بَنَى دَارًا فَأَتَمَّهَا وَأَكْمَلَهَا إِلَّا مَوْضِعَ لَبْنَةٍ فَجَعَلَ النَّاسُ يَدْخُلُونَهَا وَيَتَعَجَّبُونَ مِنْهَا وَيَقُولُونَ لَوْلَا مَوْضِعُ اللَّبْنَةِ. قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: فَأَنَا مَوْضِعُ اللَّبْنَةِ جِئْتُ فَخَتَمْتُ الْأَنْبِيَاءَ.

Maksudnya: Misalan kenabianku dan para nabi sebelumku seperti bangunan yang didirikan oleh seseorang. Orang itu menyempurnakan dan melengkapkan binaannya ini melainkan sebuah sudut yang belum dipasang batanya. Orang-orang lain memasuki binaan ini, mengaguminya dan berkata: “Mengapa dibiarkan sudut ini daripada dipasang sebuah bata?” Aku SAW bersabda: “Akulah bata itu dan akulah penutup bagi kenabian.” (Al-Bukhārī, 1407H, Jilid. 3, p. 1300)

Dalam sebuah hadith lain, Rasulullah SAW turut bersabda tentang hal ini dan menepelak ahli Kitab daripada golongan Kristian yang menyangka diri mereka lebih mengetahui keadaan Nabi Isa AS daripada Nabi Muhammad SAW, melalui sabda Baginda SAW yang berbunyi:

عَنْ أَبِي هُرَيْرَةَ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ: وَأَنَا أَوْلَى النَّاسِ بِعَيْسَى ابْنِ مَرْيَمَ فِي الدُّنْيَا وَالْآخِرَةِ، الْأَنْبِيَاءُ إِخْوَةٌ لِعَلَاتٍ دِينُهُمْ وَاحِدٌ وَأُمَّهَاتُهُمْ شَتَّى (رواه البخاري)

Maksudnya: “Akulah yang lebih tahu mengenai Nabi Isa AS di dunia dan di akhirat. Para Nabi bagaikan saudara seayah (dari sisi). Agama mereka satu (iaitu Islam) dan ibu-ibu (syariat-syariat) mereka berbeza-beza.” (Ibid. p. 1270)

Oleh itu, antara satu kaedah untuk memahami persamaan yang wujud antara elemen-elemen dalam Islam dengan agama-agama yang lain adalah menerusi paradigma *wihdah al-din* ini. Jelas sekali bahawa perkongsian akidah yang dimiliki oleh para nabi ini tidak dapat mengecualikan terdapatnya persamaan sehinggalah ke hari ini, meskipun penganut agama-agama selain Islam ini telah pun membuat interpolasi (menambah-nambah), reduksi (membuang), dan imitasi (meniru) daripada ajaran awal Nabi Adam, Nabi Ibrahim, Nabi Musa dan Nabi Isa AS. Malah perlu ditekankan di sini bahawa bukanlah Islam yang membuat peminjaman dan terpengaruh daripada agama-agama lain seperti yang didakwa oleh Zwemer, tetapi Islam melengkapkan apa yang tidak terlengkapkan dalam tingkat atau period kenabian sebelumnya

daripada aspek akidah, syariah, akhlak dan manhaj. Ini dijelaskan oleh Prof. Nasr seperti berikut:

“However there is no question of historical borrowing here as some orientalists have sought to show; the Shari’ah is a Divine Law similar in many ways to Talmudic law, but not borrowed from it or based upon it; Christ plays a very important role in Islam, but this is not a distortion of the Christian conception of Christ. The latter is, independently of Christianity, a part of the Islamic religious view. Christ and Moses, as well as the other ancient Hebrew prophets, play a part in Islam independently of any possible historical borrowing from Judaism and Christianity.”
(Seyyed Hossein Nasr, p. 134)

Dalam al-Quran dan Al-Sunnah sendiri telah dinyatakan secara jelas bahawa terdapat banyak perkara termasuklah ibadat yang sememangnya telah diperintahkan oleh Allah SWT kepada umat-umat terdahulu dan kemudian diperintahkan juga kepada Nabi Muhammad SAW dan umatnya. Antaranya ibadat solat, puasa, zakat atau infaq, tawaf, berzikir, dan banyak lagi. (Al-Nadwi, 1974, dan Abd Al-Razzaq Rahim, 2001)

Dalam Surah Al-Shura 42: ayat 15, Allah SWT berfirman bahawa *wihdah al-dīn* Islam ini sebenarnya bukan untuk difahami oleh para muslimin semata-mata, malah perlu dipanjangkan kepada saudara-saudara kita yang bukan Islam daripada moyang Adam AS. Firman Allah SWT:

فَلذَلِكَ فَادُعْ وَاسْتَقِمْ كَمَا أُمِرْتَ وَلَا تَتَّبِعْ أَهْوَاءَهُمْ وَقُلْ آمَنْتُ بِمَا أَنْزَلَ اللَّهُ مِنْ كِتَابٍ وَأُمِرْتُ لِأَعْدِلَ بَيْنَكُمْ اللَّهُ رَبُّنَا وَرَبُّكُمْ لَنَا أَعْمَالُنَا وَلَكُمْ أَعْمَالُكُمْ لَا حُجَّةَ بَيْنَنَا وَبَيْنَكُمْ اللَّهُ يَجْمَعُ بَيْنَنَا وَإِلَيْهِ الْمَصِيرُ)

Maksudnya: Oleh kerana yang demikian itu, maka serulah (Mereka - Wahai Muhammad - kepada beragama dengan betul), serta tetap teguhlah engkau menjalankannya sebagaimana yang diperintahkan kepadamu, dan janganlah engkau menurut kehendak hawa nafsu mereka; sebaliknya katakanlah: “Aku beriman kepada segala kitab yang diturunkan oleh Allah, dan aku diperintahkan supaya berlaku adil di antara kamu. Allah jualah Tuhan kami dan Tuhan kamu. Bagi kami amal kami dan bagi kamu amal kamu. Tidaklah patut ada sebarang pertengkaran antara kami dengan kamu (kerana kebenaran telah jelas nyata). Allah akan menghimpunkan kita bersama (pada hari kiamat), dan kepada-Nyalah tempat kembali semuanya (untuk dihakimi dan diberi balasan).”

Dalam *Al-Tafsir Al-Wasit*, arahan Allah SWT dalam konteks ini adalah berkenaan konsep *wihdah al-din* atau kesatuan agama yang hakiki, hurai Prof. Dr. Wahbah Al-Zuhayli seperti berikut:

”بعد أن أبان الله تعالى مبدأ وحدة الدين الحق، وأسباب البعد عنه، أمر الله نبيه بالدعوة إلى مبدأ التوحيد، ووحدة الرسالات الإلهية، فليس الدين ملكاً لأحد، وإنما واضع الدين هو الله جل جلاله، وقد ارتضى لعباده ما اتفقت عليه الرسل الكرام، بدءاً من آدم عليه السلام، إلى خاتم النبيين محمد بن عبد الله صلوات الله وسلامه عليه، مما يوجب الإيمان بما أنزل الله تعالى من الكتب كلها، لأنها مبشرات بالخير والسعادة، قائمة على الحق والعدل والميزان.“

Maksudnya: “Selepas Allah SWT menerangkan konsep kesatuan agama yang benar, dan sebab-sebab yang menjauhkan para manusia daripadanya, Allah SWT telah memerintahkan nabi-Nya untuk berdakwah kepada konsep tauhid, dan kesatuan kesemua risalah ketuhanan, dan bukanlah agama ini milik perseorangan, bahkan peletak agama ini adalah Allah SWT yang sangat mulia, yang telah meredhai bagi semua hamba-Nya apa yang tersepakat pada para Rasul yang mulia, bermula daripada Nabi Adam AS sehinggalah kepada penutup kenabian iaitu Nabi Muhammad bin Abdullah SAW di mana mewajibkan beriman dengan apa yang Allah SWT turunkan daripada setiap kitab-Nya kerana ini adalah berita gembira yang membawa kepada kebaikan dan kebahagiaan, yang tertegak atas dasar kebenaran, keadilan dan kesaksamaan.” (Al-Zuhayli, 1422H, Jilid. 3, p. 2331)

Kesimpulan

Persamaan yang wujud antara syariat dan ritual agama Islam ini dengan agama-agama lain adalah bersandarkan kepada konsep *wihdah al-din*, bukannya atas teori pinjam dan pengaruh. Sekiranya hendak digunakan teori ini sekalipun, maka agama lainlah (selain Islam) yang sebenarnya telah meminjam dan terpengaruh daripada agama Islam dan bukan sebaliknya seperti yang berlaku kepada ajaran Sikhisme, Babisme, Bahaisme dan ajaran-ajaran sesat lainnya. Sekiranya teori ini hendak dipakai ke atas Islam, maka teori ini secara serta merta menjadi *fallacy* (taakulan yang salah) kerana tidak selari dengan apa yang telah dibentangkan oleh Al-Quran Al-Karim dan Al-Sunnah *Al-Muttahharah*.

Islam amat mementingkan intervensi wahyu dalam segenap aspek ruang lingkup kehidupan manusia dan intervensi ini adakalanya merupakan syariat yang pernah diwahyukan kepada umat manusia terdahulu, malah ada juga yang bukan. Dalam konteks ini, pengkaji dan peneliti yang adil, Muslim mahupun yang bukan Muslim, tidak sepatutnya menyimpulkan secara salah bahawa Islam itu lahirnya hanya selepas kewujudan Nabi Muhammad SAW

dengan mengabaikan moyang pertama manusia yang juga Nabi terawal iaitu Adam AS. Sesuai dengan kedudukan Islam sebagai *Kubrā Al-Yaqiniyyāt Al-Kawniyyah* iaitu keyakinan terulung dalam alam ini, Prof. Dr. Al-Buti pernah menegaskan:

وإذن، فنحن حينما ندرس العقيدة وبراهينها، إنما ندرس تلك الحقائق التي ألزم الله عباده بالإيمان والاعتقاد بها منذ بعثة آدم إلى أن يرثه الله الأرض ومن عليها. وتلك هي العلاقة بين العقيدة الإسلامية وكل ما جاء به الأنبياء والرسل عليهم صلاة الله وسلامه. وأهل الكتاب يعلمون هذه العلاقة، ويعلمون وحدة الدين.

Maksudnya: Dan oleh itu, apabila kita mempelajari ilmu akidah dan bukti-buktinya, sesungguhnya kita sedang mempelajari hakikat-hakikat yang Allah SWT wajibkan ke atas hamba-hamba-Nya untuk mempercayai dan beriman dengannya semenjak zaman Adam AS sehinggalah Hari Kiamat. Dan inilah hubungan antara Akidah Islam dan semua ajaran para Nabi dan Rasul AS. Ahli Kitab mengetahui hubungan ini dan mereka mengetahui *wiḥdah al-dīn* (Al-Buti, 1997, p. 73)

Di sinilah letaknya nilai kesejagatan dan universaliti agama Islam yang merentasi masa dan tempat. Melalui bibit persamaan ini, apa yang sebenarnya patut dicari adalah perhubungan dan kebenaran, bukanlah menjadi garis pemisah dan pembeza antara kesemua agama, sehingga menjauhkan diri antara Muslim dan yang bukan Muslim. Hal ini kerana *wiḥdah al-dīn* turut membuktikan keaslian agama Islam ini berbanding agama-agama lainnya dan bukan sebaliknya.

Rujukan

- Abd Al-Razzaq Rahim. (2001). *Al-ʿIbādāt Fi Al-Adyān Al-Samāwiyyah (Al-Yahūdiyyah-Al-Masīhiyyah-Al-Islām)*. Damsyik: Penerbitan Al-Awāʿil Al-Bukhārī, Muḥammad Ibn Ismāʿīl. (1407H). *Ṣaḥīḥ Al-Bukhārī*. Semakan: Dr. Mustafa Dib al-Bughā. Beirut: Dār Ibn Kathīr.
- Al-Buti, Muhammad Saʿid Ramadhan. (1991). *Fiqh Al-Sīrah Al-Nabawiyyah Maʿa Mūjiz Li Tārīkh Al-Khilāfah Al-Rāshidah*. Damsyik: Dār Al-Fikr.
- Al-Buti, Muhammad Saʿid Ramadhan. (1997). *Kubrā Al-Yaqiniyyāt Al-Kawniyyah: Wujūd Al-Khāliq Wa Wazīfah Al-Makhlūq*. Damsyik: Dar Al-Fikr.
- Al-Nadwi, Abu Al-Hasan Ali. (1974). *Al-Arkān Al-Arbaʿah (Al-Salāh-Al-Zakāh-Al-Ṣawm-Al-Ḥajj) Fī Daw Al-Kitāb Wa Al-Sunnah Muqāranah Maʿa Al-Diyānāt Al-Ukhrā*. Kuwait: Dār Al-Qalam.
- Al-Nadwi, Abu Al-Hasan Ali Al-Hasani. (2002). *Maqālāt Wa Buhūth Hawla Al-Istishrāq Wa Al-Mustashriqīn*. Damsyik: Dār Ibn Kathīr.

- Al-Razi, Fakhr Al-Din. (2001). *Al-Tafsīr Al-Kabīr*. Beirut: Dār Iḥyā' Al-Turāth Al-ʿArabī.
- Al-Siba'i, Mustafa. (n.d). *Al-Istishrāq Wa Al-Mustashriqūn: Mā Lahum Wa Mā ʿAlayhim*. n.pl.: Dār Al-Warrāq.
- Al-Tahawi, Abu Jaʿfar. (1994). *Sharh Mushkil Al-Athār*. Suntingan: Shuaʿyib Al-Arnaʿūt. Beirut: Muʿassasah Al-Risālah.
- Al-Turjuman, Suhaylah Abd Al-Baʿith. (2002). *Nazariyyah Wihdah Al-Wujūd Bayna Ibn ʿArabī Wa Al-Jīlī: Dirāsah Taḥlīliyyah Naqdiyyah Muqāranah*. Beirut: Manshurāt Maktabah Khazʿal.
- Al-Zuhayli, Wahbah Mustafa. (1422H). *Al-Tafsīr Al-Wasīf*. Damsyik: Dār Al-Fikr
- Goldziher, Ignaz. (1981). *Introduction to the Islamic Theology and Law*. New Jersey: Princeton University Press.
- Goldziher, Ignaz. (1971). *Muslim Studies (Muhammedanische Studien)*. London: George Allen & Unwin Ltd.
- Ibnu Kathir. (2002). *Tafsīr Al-Qurʿān Al-ʿAzīm*. Kaherah: Dār Al-Ḥadīth.
- Mohamed Rifai Mohamed Ameen. (2008). "Muhy Al-Dīn Ibn ʿArabī Wa Wihdah Al-Adyān: Qirāʿah Min Khilāl Nuṣūsihi." *Jurnal Afkar*. Bil. 9. Hal. 157-184.
- Molloy, Michael. (2010). *Experiencing The World's Religions*. USA: McGraw-Hill.
- Muslim Ibn Al-Ḥajjāj. (n.d.) *Ṣaḥīḥ Muslim*. Semakan: Muḥammad Fuād ʿAbd Al-Bāqī. Beirut: Dār Iḥyā' Al-Turāth Al-ʿArabī.
- Said, Edward W. (1979). *Orientalism*. New York: Vintage Books.
- Seyyed Hossein Nasr. (1999). *Sufi Essays*. Amerika Syarikat: ABC International Group, Inc.
- Syamsuddin Arif. (2008). *Orientalisme dan Diabolisme Pemikiran*. Jakarta: Gema Insani.
- Wilson Jr., J. Christy. (1996). "The Apostle to Islam: The Legacy of Samuel Zwemer". *International Journal of Frontier Missions*. Vol. 13: 4 Oktober – Disember. Hal. 163-168.
- Yahya Murad. (n.d.) *Muʿjam Asmā' Al-Mustashriqīn*. n.pl: n. pb.
- Zwemer, Samuel M. (1900). *Arabia the Cradle of Islam*. New York, Chicago&Toronto: Fleming H. Revell Company.
- Zwemer, Samuel M. (1907). *Islam: A Challenge to Faith*. New York: Laymen's

Wan Mohd Fazrul Azdi Wan Razali
Fakulti Kepimpinan dan Pengurusan
Universiti Sains Islam Malaysia
wmfazrul@usim.edu.my

